



Republika e Kosovës
Republika Kosovo - Republic of Kosovo
Kuvendi - Skupština - Assembly

Legjislatura V
Sesioni vjeshtor

Seanca plenare e Kuvendit
P-06
Prishtinë, më 22 dhjetor 2014

P R O C E S V E R B A L

**I SEANCËS PLENARE TË KUVENDIT TË REPUBLIKËS SË KOSOVËS,
E MBAJTUR MË 22 DHJETOR 2014**

Seancën e kryesoi Kadri VESELI, kryetar i Kuvendit, ndërsa i ndihmoi Xhavit HALITI, nënkryetar.

Kryetari konstatoi se në sallë janë të pranishëm 81 deputetë dhe i deklaroi të hapura punimet e seancës plenare.

Ai procedoi me rendin e ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

Kryetari i njoftoi deputetët se Kryesia e Kuvendit, në mbledhjen e përbashkët me kryetarët e grupeve parlamentare, të mbajtur më 18 dhjetor 2014, njëzëri ka vendosur që Kuvendit t'i propozojë që shqyrtimi dhe miratimi i Projektligjit për Buxhetin e Republikës së Kosovës për vitin 2015 të behet më procedurë të përshpejtuar.

Ai e hodhi në votim propozim-vendimin e Kryesisë së Kuvendit për përshpejtimin e procedurave lidhur me shqyrtimin e Projektligjit për Buxhetin e Republikës së Kosovës për vitin 2015, sipas nenit 84 të Rregullores së Kuvendit.

Rezultati i votimit ishte, si në vijim:

Për ----- 95,
Kundër ----- 0,
Abstenime ----- 1.

Kryetari konstatoi se Kuvendi me shumicë votash mori këtë:

VENDIM

1. Shqyrtimi i parë i Projektligjit për Buxhetin e Republikës së Kosovës për vitin 2015 bëhet në seancën plenare më 22 dhjetor 2014.
2. Komisioni për Buxhet dhe Financa e shqyrton Projektligjin për Buxhetin e Republikës së Kosovës për vitin 2015 dhe Kuvendit ia parqet raportin me rekomandime.
3. Shqyrtimi i dytë dhe miratimi i Ligjit për Buxhetin e Republikës së Kosovës për vitin 2015 bëhet në seancën plenare më 29 dhjetor 2014.

Në vazhdim, Kuvendi i zhvilloi punimet me këtë:

Rend dite

1. Shqyrtimi i parë i Projektligjit për Buxhetin e Republikës së Kosovës për vitin 2015

Kryetari e ftoi kryeministrin e Kosovës që para deputetëve të Kuvendit ta paraqesë dhe arsyetojë Projektligjin për Buxhetin e Republikës së Kosovës për vitin 2015.

Kryeministri Isa Mustafa tha se për vitin 2015 presim që ekonomia e vendit ta ketë një normë vjetore të rritjes prej mbi 4%. Në këndvështrimin afatmesëm, kjo normë e rritjes pritet të jetë edhe më e lartë, si rezultat i reformave substanciale që Qeveria planifikon të ndërmarrë gjatë vitit 2015.

Në kuadër të rritjes makroekonomike pritet që kontributin më të madh ta kenë investimet private. Qeveria e Republikës së Kosovës do ta krijojë ambientin e nevojshëm për bizneset, krijimin e një partneriteti dhe bashkëveprimi me sektorin privat, në mënyrë që veprimet dhe reformat tona t'i orientojmë drejt plotësimit të gjitha parakushteve për rritjen e sektorit privat. Si rrjedhojë, investimet private pritet që gjatë viteve të ardhshme të rriten me një normë mesatare prej 8,6% dhe, rrjedhimisht, pjesëmarrja e këtyre investimeve në bruto-produktin vendor pritet që do të rritet.

Struktura e eksporteve tona vazhdon të jetë mjaft e koncentruar, e kjo në vetvete e përbën një lloj rreziku për shkak se kemi raporte zhvillimore botërore, të cilat nuk e parapëlqejnë shumë këtë strukturë.

Në rënien e çmimeve në tregun botëror, produktet dhe shërbimet që Kosova eksporton në mënyrë të drejtpërdrejtë do të ndikohet edhe në sasinë dhe vlerën e eksporteve të shërbimeve të cilat ne do t'i realizojmë në periudhën e ardhshme kohore.

Prandaj, kërkohet që gjatë viteve në vijim, përveç rritjes në tërësi të eksporteve, të punojmë edhe në diversifikimin e mallrave dhe shërbimeve për eksport, si parakusht që ta rritim eksportin e shërbimeve.

Komponentë tjetër shumë e rëndësishme e bruto-produktit vendor që është konsumi, është projektuar që në vitin 2015 të ketë një rritje prej 4%, ndërsa konsumi privat pritet të ketë një rritje edhe më të madhe.

Ekonomia e vendit është shumë e hapur ndaj ekonomive regjionale dhe më gjerë dhe çdo lëvizje e çmimeve, mallrave dhe produkteve në nivelin botëror do të bëjë që inflacioni në Kosovë të ndiqet në bazë të këtij trendi. Ne presim që niveli vjetor i inflacionit gjatë tre vjetëve të ardhshme mesatarisht duhet të sillet rreth 1%.

Të hyrat e përgjithshme buxhetore për vitin 2015 janë planifikuar të jenë në nivel prej 1 miliard e 576 milionë euro, që është një rritje prej rreth 8,1%, krahasuar me vitin 2014.

Qeveria është e përkushtuar në fuqizimin e Administratës Tatimore dhe Doganore, për ta rritur nivelin e shërbimeve të tyre, për mbledhjen e tatimeve dhe për rritjen e performansës së tyre. Komunave do t'ua ofrojmë mbështetjen e duhur, në mënyrë që qeverisja lokale ta rrisë performansën dhe, rrjedhimisht, të rritet pavarësia fiskale e pushtetit lokal nga ai qendror.

Sa i përket shpenzimeve, do të vazhdojnë investimet në infrastrukturën rrugore, në sektorin e arsimit, të shëndetësisë, në fushën e sigurisë dhe në bujqësi.

Nëpërmjet këtij projektbuxheti do të bëhet i mundur adresimi i një sërë sfidash në fushën sociale, siç është rasti me kategoritë e dala nga lufta, pensionistët, ish të burgosurit politikë, familjet në asistencë sociale, e kështu me radhë.

Sa i përket rritjes së pagave, në projektbuxhet është përfshirë rritja nga ky vit, kurse rritjet e tjera të mundshme do të shqyrtohen gjatë vitit në harmoni me mundësitë buxhetore.

Gjatë vitit 2015 do të fillojmë me implementimin e Ligjit për sigurime shëndetësore dhe Kosova do t'i ketë skemat e sigurimeve shëndetësore për qytetarët e saj.

Kryeministri theksoi se presioni kohor që ta aprovojmë buxhetin sa më parë nuk ka mundësuar që të ndërhyjmë në tekstin e Projektbuxhetit, të cilin e ka përgatitur Qeveria e kaluar.

Në fund, kryeministri i ftoi deputetët për miratim në parim të Projektligjit për Buxhetin e Republikës së Kosovës për vitin 2015. Fjala e kryeministrit është dhënë e plotë në transkript.

Pastaj, propozim-buxhetin për vitin 2015 më hollësisht e arsyetoi ministri i Financave, Avdullah Hoti. Ai tha se propozim-buxheti që është proceduar është përgatitur dhe është proceduar në Kuvend nga Qeveria e kaluar. Qeveria e re është e përkushtuar të reflektojë në mundësinë e parë që ne e kemi për ta rishikuar këtë buxhet, në qershor 2015, dhe mandej në buxhetet e ardhshme afatmesme në kuadër të kornizës afatmesme të shpenzimeve, 2016-2018.

Qeveria do të përkushtohet për krijimin e vendeve të reja të punës nga ndërmarrjet e vogla dhe të mesme si gjenerator kryesor i të ardhurave të familjeve dhe vendeve të punës. Ta rritim aftësinë konkurruese të ekonomisë kosovare, si e vetmja mundësi që ne të konkurrojmë me kompani ndërkombëtare në tregjet vendore fillimisht dhe pastaj edhe në tregjet ndërkombëtare.

Investimet private si gjenerator kryesor i rritjes ekonomike pritet të rriten me një normë prej 8,6%, duke rritur kështu pjesëmarrjen e tyre në bruto-produktin vendor prej 19%, sa pritet të mbyllet viti 2014, në 21%, në vitin 2017.

Eksporti pritet të rritet me 7%, ndërkaq importet me 5%, duke mundësuar një zvogëlim sado modest të deficitit të thellë tregtar që e ka Kosova.

Konsumi agregat për vitin 2015 është planifikuar të rritet me 4%, gjë që do të ndikojë në kërkesën agregate në vend për ta mbajtur kërkesën për mallra dhe shërbime, e kështu edhe rritjen ekonomike në vend. Pritet të ketë një rritje modeste të çmimeve prej 0,5%, që do të reflektohet pak në fuqinë blerëse të të ardhurave të familjeve kosovare, por rënia e çmimeve të derivateve të naftës kohëve të fundit pritet të ndikojë në zvogëlimin e kostos të të gjitha bizneseve në vend, duke e rritur kështu aftësinë konkurruese të bizneseve vendore.

Dërgesat e qytetarëve presim të mbeten stabile dhe të ruhet kështu fuqia blerëse dhe niveli i standardit të jetës së familjeve që pranojnë dërgesa nga qytetarët.

Në vitin 2015, të hyrat e përgjithshme buxhetore planifikohen të jenë në nivel prej 1 miliardë e 576 milionë, që është një rritje prej 8,1%, krahasuar me këtë vit që po e përmbylлим. Të hyrat nga tatimet e brendshme pritet të rriten me 17%, jo për shkak të rritjes së barrës tatimore për biznese ose për qytetarë, por për shkak të rritjes së kapaciteteve të Administratës Tatimore për ta menaxhuar më mirë ekonominë joformale. Të hyrat nga Dogana priten të rriten me vetëm 3%.

Rritje planifikohet të ketë edhe të hyrat e tjera buxhetore, duke përfshirë të hyrat jotatimore me 2,1% dhe të hyrat vetjake të komunave, prej 10%. Kemi rritje të konsiderueshme të subvencionimit në bujqësi, që në vitin 2015 planifikohet të jetë 53,6 milionë euro.

Shpenzimet kapitale planifikohen të jenë 470 milionë euro, pjesëmarrja e të hyrave në shpenzime të përgjithshme buxhetore do të mbetet rreth 28%, që është pjesëmarrje e kënaqshme, duke pasur parasysh dinamikën e përgjithshme në vend.

Janë planifikuar investime në infrastrukturë rrugore, në arsim, në shëndetësi dhe në fusha tjera.

Në sektorin e shëndetësisë parashihet rritje prej 2,2 milionë për fillimin e reformës në shëndetësi, rritje prej 10 milionë për zbatimin e Ligjit për sigurime shëndetësore.

Në sistemin arsimor është rritur granti specifik për arsim për komuna prej 10 milionë euro, për të mundësuar investimet kapitale, që janë në vijim e sipër në shumicën e komunave.

Buxheti i Ministrisë së Punës dhe Mirëqenies Sociale për vitin 2015 do të rritet për 79,3 milionë euro, për ta mbuluar së pari rritjen e pensioneve për të gjitha kategoritë e përfituesve, me 25%, zbatimin e skemës për Ligjin për ish të përndjekurit politikë dhe rritjen eventuale të përfituesve të skemës sociale dhe të pensionistëve.

Në sektorin e drejtësisë dhe të sigurisë është rritur buxheti për reforma në këtë sektor, për t'i përmbushur kriteret për liberalizim të vizave dhe kriteret tjera, që kërkohen sipas Raportit të Progresit të Komisionit Evropian.

Në Ministrinë e Punëve të Brendshme do të ketë një rritje prej 9 milionë euro, në Ministrinë e Forcës së Sigurisë, një rritje prej 3 milionë euro, në Këshillin Gjyqësor të Kosovës, një rritje prej 0,7 milionë euro dhe në Prokurorinë e Shtetit, një rritje prej 0,2 milionë euro.

Në nivelin lokal të hyrat buxhetore parashihet të jenë 424,1 milionë euro, ndërsa shpenzimet prej 412,1 milionë euro.

Sipas Ligjit për menaxhimin e financave publike dhe përgjegjësitë, deficitin buxhetor kufizohet me 2% të bruto-produktit vendor dhe në jemi të vendosur që ta ruajmë këtë rregull fiskale në të mirë të stabilitetit financiar në vend.

Në fund, ministri i ftoi deputetët që ta miratojnë në parim propozim-buxhetin e Republikës së Kosovës për vitin 2015, si dhe kontributin e tyre ta japin gjatë shqyrtimit të tij në Komisionin për Buxhet dhe Financa.

Lidhur me projektligjin për projektbuxhetin e Republikës së Kosovës për vitin 2015 diskutuan: Naser Osmani, në emër të Komisionit Funkcional për Buxhet dhe Financa dhe në emër të Grupit Parlamentar të LDK-së; Safete Hadërgjonaj, në emër të Grupit Parlamentar të PDK-së; Besnik Bislimi, në emër të Grupit Parlamentar të Lëvizjes “Vetëvendosje”; Donika Kadaj-Bujupi, në emër të Grupit Parlamentar të AAK-së; Sasha Milosavljeviq, në emër të Grupit Parlamentar LS; Jakup Krasniqi, në emër të Grupit Parlamentar “Nisma”; Fikrim Damka, në emër të Grupit Parlamentar “6+”, si dhe deputetët: Ramush Haradinaj, Muhamet Mustafa, Albin Kurti, Shpejtim Bulliqi, Duda Balje, Zenun Pajaziti, Valdete Bajrami, Margarita Kadriu-Ukelli, Arben Gashi, Fatmir Limaj, Time Kadrijaj, Glauk Konjufca, Emilija Rexhepi, Alma Lama, Blerim Shala, Albulena Haxhiu, Vjosa Osmani, Naim Fetahu, Besa Gaxherri, Pal Lekaj, Shukrije Bytyçi, Visar Ymeri, Njomza Emini, Zafir Berisha, Shqipe Pantina, Daut Haradinaj, Puhie Demaku, Armend Zemaj, Kujtim Paçaku, Shaip Muja, Ismajl Kurteshi, Bali Muharremaj, Haxhi Shala, Anton Quni, Besa Baftija, Teuta Haxhiu, Qerim Bajrami, Nuredin Ibishi, Salih Salihu, Rustem Berisha, Danush Ademi, Veton Berisha, Aida Dërguti, Lahi Brahimaj, Blerim Grainca, Rexhep Selimi, Ilir Deda, Mytaher Haskuka, Fisnik Ismaili, si dhe ministrat Skender Hyseni e Avdullah Hoti, diskutimet e të cilëve janë dhënë të plota në transkript.

Në fund të debatit, kryetari e hodhi në votim Projektligjin për Buxhetin e Republikës së Kosovës për vitin 2015. Rezultati i votimit ishte, si në vijim:

Për ----- 73,
Kundër ----- 22,
Abstenime ----- 0.

Kryetari konstatoi se Kuvendi e miratoi në parim Projektligjin për Buxhetin e Republikës së Kosovës për vitin 2015.

Kuvendi e ngarkoi Komisionin për Buxhet dhe Financa, si komision funksional dhe raportues, që ta shqyrtojë projektligjin dhe Kuvendit t’ia paraqesë raportin me rekomandime para seancës plenare, që do të mbahet më 29 dhjetor 2014.

Kryetari e deklaroi të mbyllur seancën plenare në orën 19:20 minuta.

Kryetari i Kuvendit

Kadri VESELI

*Procesverbalin e hartoi:
Drejtorja për Çështje Plenare dhe Procedurale*